



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :



Tir Yimyim



tir_yimyim



tir yimyim

TAPAK 7



**Nenoki metenzüksüla
rara tenzük: Trump**



**Shubman No. 1
asayar kümogo**

VOL. XXII ISSUE NO. 127 (ADOK 127) DIMAPUR YANGTEPNÜ (THURSDAY) TSÜKLAI (FEBRUARY) 20, 2025 ₹ 5.00

Tesayur rationalization ajanga khuret ajururtemi shidi zülutsü metetdaksür

Dimapur, February 19, 2025

(TYO): Directorate of School Education (DoSE)-i February 6 aser 10, 2025 anogotem "Rationalization of Teachers" sangdong agütsüba dak sendakba tebilemtsü alirtemi anogo 10 tsüngda department dangi shidi ajanga tebilemba lemsateptsü metetdaksüogo.

Iba sangdong dak sendakba nung tebilemtsü aliba kija/Village Councils /SMCs gen /SMDCs / Students' Unions-i February 28, 2025 tashi nung bangdak DEOs/ Sr SDEOS/SDEOs dangi shidi ajanga tebilemba lemsatepang mepishir ta Principal Director, Thavaseelan K, IAS-i Febbruary 19, 2025 nü sangdong ka nung metetdaksüogo.

"Shidi nungji kuli tejangja alitsüla aser rationalization

exercise atema jashiba mesüi kobala onüktem reprangshimtsüla zülur agütsütsüla" ta Principal Director-i ashi.

Maneni DEOs/Sr. SDEOS/ SDEOs-i pei pei telongtet nung shiditem bendentsü aser anogo pungu (March 5, 2025) asadanger bangdak DEO/ DEO in-charge ajanga Directorate dangi abentsü, ta paisa metetdaksü.

DoSE-i rationalization exercise inyakba nung khuret alirtemi media sabangtem ajanga masü saka tim teinyaktsü lenmang ajanga pei pei khuretttem lemsateptsüla. Department-i nüngdak ta asüba onük ajak agizüksü aser timi aser tashishitsü melii inyaka aotsü, ta Thavaseelan K-isa metetdaksüogo.

NFHRCC-i tanü Baghty Division atema senden ayonger

Dimapur, February 19, 2025

(TYO): Foothills Road kübok Baghty Division nung maparen dak sendakba nung tebilemtsü ajuruba agi Nagaland Foothill Road Coordination Committee (NFHRCC)-i February 20, 2025 nü Kin Hoho tongtitem aser Dimapur nung amenoka aliba kin hohotem den rongdak senden ka amentsü jazükogo.

Sendenji asüng nikongdang 5:00 ako nung NFHRCC Base Office, Kher Mahal, Dimapur nung amentsü anungji nisung ajak arua adentsü mepishir ta NFHRCC-i sangdong ka nung metetdaksüogo.

Külen, Lotha Hoho-ia tanga sangdong ka nung contractor temi Nagaland Foothills Road

Coordination Committee (NFHRCC) den implementation agreement nung sign asütsüla ta nenshia metetdaksüogo.

February 14, 2025 nü Lotha Hoho senden ka amendang firms/ contractors-i NFHRCC telatetba aser inyakyim sülen anidaktsüla mesüra parnok nem contract mapa meinyakdaksütsü ta bangjemshiogo.

NFHRCC den implementation agreement nung sign masüba firm/contractor nem mapa inyaka moudaksütsü aser parnoki mapa inyaka aodang timtem kar danga ajurura iba tebilemtsü khuretji parnoki (firm/contractor) abentsü ta Lotha Hoho-isa metetdaksüogo.

Congress tanishirtemi Wokha semdang

Dimapur, February 19, 2025

(TYO): Nagaland atema AICC Secretary In Charge Christopher Tilak aser MP & PCC President S. Supongmeren Jamir nati anir lennirtemi Wokha District Congress Committee (DCC) den ajurutepa senden ka menogo.

Congress Bhavan, Wokha nung senden ka amendang parnoki party tashi aittsü, yimten tayongzükbatem atema inyaktsü aser district nung lennirtem adokdaksütsü onüktem lemsatep.

"Mahatma Gandhi-i nübortem ajungmesotsü atema India ajungalen sema senzüba ama Rahul Gandhi'er Bharat Jodo Yatra ajanga nübortem tonga aoer" ta Christopher Tilak-i ashi.

"Congress-i Nagaland nung alirtemi dangi osang sangoktsütsüla aser o jembitetba lennirtem alitsüla. BJP-i nübortem anisar aser employment o development nung

temulung magütsür. Congress züngsemtemi ochi aser tashishitsü maliba tangateba nung voters den sendakteptsü ayongzüker" ta Tilak-i ashi.

"Tanishirtemi tajungtem shimtsüla aser iba ya talisa PCC nung lir kechiyong nenoki constituency jenjang nung mapa inyaker. Nagaland nung Congress asentenshitsü atema party yanglushir aser akoktsü ta ajitetertem dang tanishir shimtsü. Party inyaksangshi yangluba mapang mangatettep adoktsü akok saka shinga mezüngdoktsü" ta Supongmeren Jamir-ia ashi.

"Roadmap 2025-26 kübok Congress-i 2028 elections atema renemer aser iba roadmap ya Rahul Gandhi-ia agizükogo" ta Working President, NPCC Khriedi Theunuo-ia metetdaksü. Nagaland nung nübortem tenzüksü tenangzükbaba yur statewide tour program agir ta paisa ashi.

CM Rio-i Naga nunger longjemtsü ayongzüker

Kohima, February 18, 2025

(TYO): Naga yimten tebilemtsü, Centre-i Protected Area Regime (PAP) tanaben benokba aser Free Movement Regime (FMR) agienba onüktem koktetsü atema Naga nunger longjemtsüla ta Chief Minister Neiphiu Rio-i ayongzüko.

Kohima nungi kiloentre 19 shi pilar Tsiesema Basa Village küm 50 ajungba benjung nung jembidang Rio-i iba onük jembi.

Tsiesema Basa Village ya Northern Angami-II Assembly Constituency nung lir aser iba CM Rio indang constituency lir. Tsiesema Basa Village ya 1975 küm kilen 24 agi aküm saka tanübo kilen 106 kümogo.

Ozü sorkari wadang ajak nung terenlok bener arutsü aser tejakleni aotsü tenzangzükbaba lir saka Naga yimten tebilemtsü ajanga tetsükdaksü ajurur, ta CM Rio-i ashi.

Iba khuret koktetsü atema meranga inyaker saka tongtipangbaji Naga nungeri pei maitsü metettsüla aser longjemmer putepa alitsüla, ta pai ashi.

"Centre-i Protected Area Regime (PAR) tanaben benokba ajanga state telungi foreign tourists aruba alenbanger. Ano Indo-Myanmar arrtsülen Free Movement Regime (FMR) agienba ya tebilemtsü khuret ka lir. State sorkari item onük atema süoki ia bilemer aser nübortem atema bilemtsür, anungji olemtep aser tangatettep nüngdaker" ta paisa ashi.

"Ozü sorkari terenlok mapa aika tenzüker saka Naga yimten tebilemtsü ajanga sorkar mapatong aser sentong aika takok ngua meinyakteter. Külen state-i asüngdangba ama Centre-ia mapatong tulutem atema temelaba magütsür" ta CM Rio-isa metetdaksü.

"State sorkari Centre dang tekaraba nung Naga yimten latettsü nenshir kechiyong iba ajanga dang state renloka aotsü. Nagaland nung tensa tajungba kümogo saka yimten tebilemtsü aliba den ano Centre-i PAR tanaben benokba aser FMR agienba ajanga khuret lir" ta paisa ashi.

"State sorkari Centre dang

PAR aser FMR lemtettem meyipa reprangshitsü mepishiogo. Külen zünsigem 60 agi akümba State Assembly longjemmer Naga yimten latettsü mepishiogo saka tang tashi telangzüba tajung kecha mali" ta paisa metetdaksü.

Naga nunger kanga kümdanga inyaktsüla aser state dak sendakba tebilemtsütem koktetsü atema longjemtsüla ta Rio-i ashi.

British yimsüsüba mapang Naga sobaliba ozüngtem, maitsü, aser inyaksangshi meraktsü. Centre-ia tanü Naga nunger balaka ta agizükba nung sobaliba senmang wazüka ayutsüla ta paisa ayongzüker.

"Nagaland sorkari welfare schemes aika tenzükbaba lir aser iba nung health insurance aser skill training o entrepreneurship atema microfinance loans dena lir. Centre sorkar indang Jal Jeevan Mission kübok Nagaland nung yimtsüng ajak nung kilen 92% tashi tongogo aser yimtsüng ketdangsürtemi kanga kümdanga completion certificates agütsütsüla" ta CM Rio-i ashi.

W/C/NNPGs-i Opposition MP 21 aser GNF indang langzür

Dimapur, February 19, 2025

(TYO): 1964 Indo-Naga bilateral ceasefire aser Prime Minister jenjang nung olemtep trokben tashi tamakok anguba sülen Naga nunger ajaki agizüksüsa lemtet ka agitsü meranga arur saka Naga yimten telok balala tentetba aser telok sasep nung mepetmesü balala adokba ajanga tetsükdaksü ajurur. Anungji tanü Naga nunger tsüngda yimten tangatetba ka nüngdaker aser iba ajanga dang tebilemtsü koktetsü ta Working Committee, Naga National Political Groups (WC-NNPGs)-i metetdaksüogo.

Iba atema W/C NNPG-i sendaktepa aliba Naga nunger ajak den asüngdangtepa aser parnoki nungitba sülen India sorkar den yimtenren olemtep tenzük aser iba mapang political roadmap ka renemogo, ta Media Cell, W/C NNPG-i ashi.

October 19, 2019 nü India sorkar aser Naga olemtepertem tsüngda yimtenren olemtep tembangogo ta asüba ajanga yimten tekaraba nung latettsü merangba kuli agütsür.

Rajya Sabha nung opposition MP 21-i Amit Shah dangi shidi ka züluba ajanga "Framework Agreement" ta Indian Union kübok telatetba ka lir ta jangjatsüogo. Iba kasa ya taoba Interlocutor RN. Ravi-i Indian Parliament nung "select

committee" aser Nagaland Legislative Assembly nung shiogo, ta W/C NNPG-i ashi.

Rajya Sabha MP 21 ya nübortem atema noktaktertem aser linük meimertem lir anungji parnoki Constitution of India, Sovereignty & Integrity of India atema tezüngzüktep agiba sülen anidaktsü. Opposition MP 21-i Framework Agreement kanga junga meteta lir aser "National Integrity" dak kongshiba mesüra "Indian Constitution" aser "Sovereignty of India" asoshi lendong aliba tenangzükbaba kecha pusema menokdaksü. Ajisüaka, parnoki tekaraba nung Naga yimten latettsü nungitba atema tenüngsang agütsür ta W/C NNPG-isa metetdaksüogo.

Framework Agreement aser Agreed Position ya kasa Interlocutor aser kasa India Prime Minister den sign sütep. Ajisüaka Agreed Position ya jelia asüngdangyaba aser sendaktepa alirtemi pusemba sülen ang sign sütep aser yimjak nung lir. Külen, Framework Agreement yabo NSCN-IM telok meyong dang lir aser olemtepa aruba ya parnok lennir teshimtet kari dang meteta lir. Tang tashi Framework Agreement ya miima dang yua lir aser Naga nunger shingaia iba nung kechisa keta lir memetet anungji iba ya Naga nunger ajaki pusemba agreement ka masü ta

parnoki ashi.

Anungji, Global Naga Forum (GNF)-i Framework Agreement nung keta aliba osang tejangja metetdaksütsüla aser Naga nungeri pusemba Agreed Position ya kodaser Framework Agreement anema yangluba kuli agütsütsüla ta W/C NNPG-i asüngdangogo.

NSCN-IM atema ola adoktsür GNF-i Framework Agreement nung keta aliba shared-sovereignty, contemporary realities aser co-existence ya rasa metetdaksütsüla, ta parnokisa ashi.

GNF ama NSCN-IM atema ola adokertemi Naga yimten teloktem rongnung telemsa adokdaksür aser NPGs tsüngda putephitsüba aser longjemtsü merangba nung tetsükdaksü bentsür arur. Anungji GNF-i public dang parnok jenjang aser tamendakdak jangjatsütsü akhanger ta W/C NNPG-isa metetdaksü.

Framework Agreement ya NSCN-IM pur atema dang aser iba nung Naga yimten tebilemtsü atema sendaktepa aliba Naga nunger maden ta GNF-i metettsüla ta parnokisa ashi.

Naga yimten latettsü atema tetsükdaksü ka dang alibaji NSCN-IM aser parnoki amshiba teloktem dang lir ta Media Cell W/C,NNPG-isa metetdaksüogo.

Indianungi ketdangsür temi New Zealand semdang



Jt. Secretary, Horticulture, Ministry of Agriculture & Farmers Welfare, Government of India, Priya Ranjan den Indian delegation tem külemi tangokba noksa ka yangi angur.

Dimapur, Tsüklai/February 19 (TYO): Nagaland nungi nisung ana, Meyasashi, Director, Horticulture aser S. Senka, Joint Director, Horticulture densema züngsem pongu Indian delegation-i February 12-15, 2025 anogotem New Zealand semdanga liasü.

Iba sentong ya Delhi nung aliba New Zealand Embassy ajanga India nung kiwifruit industry renlokdahtsütsü asoshi roadmap aser tasa ka ama Zespri International Limited, New Zealand den lungjemer ayongzüka liasü.

Iba mapang Indian delegation temi Auckland, New Zealand nung Consul General

of India, India-New Zealand Business Council, Plant & Food Research aser Kiwifruit Breeding Centre nungi scientists tem, Zespri International Ltd. indang CEO aser ketdangsürtem aser Mori kiwifruit growers densema tongtipang stakeholders tem den sensaksema liasü.

Parnoki kiwifruit orchards, export packhouses aser kiwifruit nurseries balala semdanga kiwifruit tzünüba, post-harvest management aser export inyakyim indang shisatsü aser yimya angazüka liasü.

India nung kiwifruit timtiba adokdahtsüba state tem rongnung Nagaland ya

tanabuba jenjang nung lir, anungji International collaborations, talisa New Zealand den teka amteper inyakba ajanga state kanga ajangzüksü. Alima nung kiwifruit timtiba züsenteta bendang limai yokba rongnung New Zealand ya tematiba jenjang nung lir.

Kiwifruit industry nung Central aser State sorkari linük balala den amalitepa inyaksü mera agiba, expertise aser advanced techniques tem melentepba ajanga linük nunga kiwifruit tali züsenteta talisa Nagaland ama state tem nung aluyimer takum jenjang tajungba akumtsü aser rongsenketzüng aintsü.

DoHFW ajanga packaged drinking water atema metetdahtsür

Dimapur, Tsüklai/February 19 (TYO): Department of Health & Family Welfare ajanga sangdong ka nung Food Safety and Standards (Prohibition and Restrictions on Sales) Regulations, 2011 indang ozüing kar melenshia tang nungi amshitsü ta metetdahtsü.

Iba ozüing 2.3, sub-regulation 2.3.14, clause 17 aser 18 nung "Bureau of Indian Standards (BIS) Certification Mark temelaba kübok dak alaka nisung shingaia packaged drinking water aser mineral water yanglutsü, ayoktsü mesüra ayoktsü atema sayutsü memelar," ta shia lir. Clauses 17 aser 18 indokogo.

Anungji tajemtsü tzü manufacture asüba Food Business Operators temi BIS

Certification Mark meshitsü menüingdak. Ajisüaka parnoki kechi südir süaka online portal <https://foscoss.fssai.gov.in> ajanga Food Safety License Certificate meshitsüla, ta sangdong ajanga ashi.

Tzü tendangba report ya nüngdakba document asütsü aser Food Safety & Standards Authority of India ajanga metetdakja aliba Laboratory, kong Packaged Drinking Water and Mineral Water tendangteter, item nung tendangtsüla.

Packaged drinking water bottle tem nung item tejangja ya shidak inoka alitsüla:

1. Name of the product
2. Name and address of the Manufacturer
3. Brand name, if any

4. Lot/Batch number
5. Date of processing/ packaging
6. Best before date
7. FSSAI logo and license/ registration certificate number

Iba sangdong yagi taoba mapang sangdonga aliba (NO.DHFW-21/FSSA/BIS/13/2021-22/274-79 dated 25th July 2024) melenshitsür. Teyari tali nüngdaker temi Food Safety Section, CMO Office of Kohima, Mokochung aser Dimapur semdangtsü akok.

Ibai nübur ajungtsü asoshi sangdonger. Aser iba sangdong sülen manidaker ya FSSA 2006 indang Section 58 aser 63 nung aibelener asütsü, ta sangdong ajangasa ashi.



Ramdi Thou Farm, Mhainamtsi, Jalukie nung February 19, 2025 nü "Entrepreneurship Development in Commercialization of Common Carp Breeding" indang workshop ka ayongzüka agidang tangokba noksa ka nung ketdangsürtem aser workshop nung shilem agirtem angur.

DIPR ajanga metetdahtsür

Dimapur, Tsüklai/February 19 (TYO): Directorate of Information & Public Relations ajanga, March 3, 2025 nungi tenzüksü aliba 14th Nagaland Legislative Assembly indang Sixth Session agiba osang

abentsüpur ajungai pei tenüng, designation, organisation aser Car No. (Car pass atema) iprnagaland@gmail.com nung February 27, 2025 matongdang agütsütsü sangdong ka nung metetdahtsüogo.

Department ajanga nung Grade IV eGPF amshitsü

Dimapur, Tsüklai/February 19 (TYO): State nung aliba Department ajanga nung Grade IV eGPF

amshitsü Nagaland Angh-i melaogo, ta Finance Department sangdong ka ajanga ashi.

Department of School Education ajanga metetdahtsür

Dimapur, Tsüklai/February 19 (TYO): Department of School Education ajanga sangdong ka nung, temelaba agüja aliba Private Schools (Primary aser Upper Primary) recognition, renewal of recognition aser up-gradation indang application format aser permitted Pre-Schools atema recognition format tem Department indang website

[h t t p s : / / education.nagaland.gov.in](https://education.nagaland.gov.in) nung upload süja lir, ta ashi.

Iba formats ya iba sangdong agütsüba anogo nungi tenzüka March 15, 2025 tashi angutsü. Anungji apply sünüba school temi nüngdakba format download süa kasaji Department nem latetja aliba mapang agütsütsü metetdahtsür, ta sangdong ajanga ashi.

Dimapur District Skill Committee senden amen

Dimapur, Tsüklai/February 19 (TYO): Dimapur District Skill Committee indang tatembangba quarterly meeting February 19, 2025 nü Deputy Commissioner, Dimapur indang office nung ADC, Dimapur, Zakabo V Rotokha, NCS lenisüba kübok mena liasü.

Iba senden nung Gideon Sumi, District Employment Officer, Dimapur ajanga ashiba

agi, Department of Employment, Skill Development & Entrepreneurship ajanga 2024-25 atema skill development programs aika semzüksü, kong State-Funded PACES Program for training in electrician (160 candidates) aser baking (160 candidates), aser ano candidates 25 atema tatem kuma telemtetba magi lir aser Centrally Funded SANKALP Project kübok Assistant Electrician & Carpentry (50 candidates) aser Food Processing (50 candidates) lir.

Item ya district nung lanurtem mapa angutsü jenjang tajungba kumdahtsütsü aser pei peria aayanga litettsü nükjidong nung lir.

Temsüa aliba candidate temi tenüng agütsütsü ayongzüker aser iba atema Department of

Employment, Skill Development & Entrepreneurship, Dimapur den tongteprateptsü akok ta ashi.

Pai ashiba agi technical courses atema tenüng zülüokba tali kumogo, sectors balala nung takok ngua placements yokogo aser local businesses den lungjemer inyakba ajanga iba sentong nung takok anguba sayur.

Kasa senden nung ki o jen agi meperiba, senotsü teyari agütsüba nung timtem ajuruba amala indanga jembi aser tarutsü nung inyakyim tajungba akumtsü sentongtem yanglua liasü.

Sector balala nung employees temi skill development aginüba tali akumba indanga DEO ajanga lemsatapa liasü.

"Employees temi parnok indang skills tajungba kumdahtsütsü asoshi maongka bushir. Aser parnok nem training tajung agütsütsü atema onoki akok tashi sentong balala yanglur," ta Sumi-isa ashi.

Skill development tsütsü Dimapur district ya tesep ka amai lir, aser vocational training sentongtem ulushitsü meranga inyaktar, ta paisa iba senden nung ashi.

Kohima district nung Block Level Aadhaar enrolment & updation camp agitsü

Dimapur, Tsüklai/February 19 (TYO): Deputy Commissioner, Kohima, Kumar Ramnikant ajanga sangdong ka nung Kohima district kübok tesem balala nung Block Level Aadhaar enrolment and updation camp alitsü ta metetdahtsüogo.

Iba camp nung tanur tenüng zülüokba, MBU, mobile number update asüba, demographic updates aser biometric updates densema Aadhaar services agütsütsü.

Iba enrolment drive nungya blocks shia sorkar indang kakot

reju tem adentsü.

Camp ya item anogo, mapang aser tesem nung agitsü: February 25th, 2025 (09:00 AM) - Council Hall, Kijumetouma Bawe

February 26th, 2025 (09:00 AM) - Council Hall, Zhadima Village

February 26th, 2025 (01:00 PM) - Council Hall, Vipphoma

February 27th, 2025 (09:00 AM) - Council Hall, Tuophema

February 28th, 2025 - Council Hall, Seiyhama.

Rekha Delhi CM asütsü; Parvesh Dy. CM asütsü



New Delhi, Tsüklai/February 19 (Agencies): Delhi assembly election nung BJP-i takok anguba sülen anogo aika lir tesüsa Bodhbar aonung Chief Minister tenüng sangdongogo; Rekha Gupta Delhi Chief Minister asütsü aser Parvesh Verma Deputy Chief Minister asütsü.

Linük nung tang BJP-i yimsü tesüdak state tem nung tetsür chief minister ji Rekha Gupta dang asütsü. Lai Shalimar Bagh assembly constituency menden nungi takok angu aser Parvesh Verma-i New Delhi assembly menden nung AAP tongti lenir, Arvind Kejriwal madak takok ngua liasü. Bodhbar aonung BJP legislature party senden

amenba sülen CM aser Dy.CM tenüng sangdonga liasü.

Assembly menden 70 aliba Delhi nung BJP-i menden 48 nung takok angu aser tanünga menden 22 nungji Aam Aadmi Party (AAP)-i takok ngua liasü.

Brihostibar anüngdang Ramlila Maidan nung sorkar tasenba tenangzükba sentong agitsü. Iba sentong nungji BJP-i yimsüsüba state tem nungi chief minister tem, BJP nung tongti lenirtem aser lenla balala nung nüngtugu nisung aika adentsü.

Delhi election jakdang BJP-i manifesto nung tenangzükba aika nangzuka liasü. BJP-i Matru Suraksha Vandana scheme kübok mashisa

tetsürtem nem nutrition kits 6 agütsütsü aser sen 21,000 agütsütsü nangzuka lir.

Sensaker tetsürtem nem cylinder sen 500 agi agütsütsü aser Holi & Diwali benjungtem nung gas cylinder kaka angati agütsütsü; Mahila Samridhi Yojana kübok Delhi nung tetsür shia nem ita shia sen 2,500 agütsütsü aser Atal Canteens nung Delhi kübok slum nung alirtem nem chiyungtsü sen 5 agi dang agütsütsü. Arrshi küm 60 nungi 70 tsüngdapurtem nem pension 2,000 agüja aliba nungi sen 2,500 kümtsütsü aser arrshi küm 70 ser temapur teintet sensotem, amitsürtem aser meshimejunger tetsürtem nem sen 2,500 agüja aliba nungi sen 3,000 kümtsütsü, ta manifesto nung nangzuka lir.

Delhi nung Ayushman Bharat scheme benoktsü aser Delhi sorkar nungia teyari sen lakh 5 tali agütsüsemstsü. Delhi nung alirtem nem Ayushman Bharat scheme kübok health cover sen lakh 10 tashi agütsütsü, ta parnokisa nangzuka lir. BJP-isa Delhi nung mopung menenba nokdangtsü aser Yamuna ayong merüktettsü nangzük.

G20 Foreign Ministers senden nung EAM Jaishankar adentsü

New Delhi, Tsüklai/February

19 (Agencies): External Affairs Minister (EAM), S Jaishankar-i February 20-21 anogotem nung South Africa semdangtsü aser Group of 20 (G20) Foreign Ministers' senden nung adentsü, ta Bodhbarnü Ministry of External Affairs-i metetdaksü.

Ministry of External Affairs-i sangdong ka ajanga, South Africa nung International Relations and Cooperation Minister, Ronald Lamola-i jaokba nung ajemdaker EAM Jaishankar-i Johannesburg semdangtsü, ta metetdaksü.

Jaishankar-i G20 senden nung shilem agiba ajanga India-i G20 linüktem den inyaksangshiba tashi itshitsü aser iba sabang nung Global South atema ola alitsü, ta MEA-i metetdaksü.

External Affairs Minister-isa linük balala nungi Foreign Ministers den jurila senden


amentsü.

South Africa ya 2024 küm December 1 nungi November 2025 tashi G20 Tir lir.

G20 nung linük 19- Argentina, Australia, Brazil, Canada, China, France, Germany, India, Indonesia, Italy, Japan, Republic of Korea, Mexico, Russia, Saudi Arabia, South Africa, Turkiye, United Kingdom aser United States lir; iba denji bloc ana- European Union aser African Union densema lir.

Alima nung Gross Domestic Product (GDP) shilem 85 bo G20 züngsem linüktem indang lir, alima nung shishilembaba shilem 75 aser alima nung nütsüng shilem asemsü nungi shilem anabo G20 linüktem indang nütsüng lir.

Ano külen tanga osang ka nung, US Secretary of State, Marco Rubio-i pabo taruba G20 senden nungji medentettsü, ta metetdaksüogo.



February 19, 2025 nü New Delhi nung Congress party general secretaries aser state in-charges senden nung Congress Tir, Mallikarjun Kharge aser Lok Sabha nung opposition lenir, Rahul Gandhi na adenba noksa nung angur.

Gyanesh Kumar-i CEC mapa agizükogo



February 19, 2025 nü New Delhi nung Gyanesh Kumar-i Chief Election Commissioner mapa agizükba sülen tangokba noksa nung angur.

New Delhi, February 19 (Agencies): Chief Election Commissioner (CEC) aser Election Commissioner (EC) tasen shimba dak sendakba nung mangatettep adoka lia Bodhbarnü Gyanesh Kumar-i Chief Election Commissioner (CEC) mapa agizükogo.

Election Commissioner anaji Vivek Joshi aser Sukhbir Singh Sandhu na asütsü.

2024 küm March ita nungi Election Commissioner inyaksang Kumar Hombarnü CEC shima liasü. Pai Rajiv Kumar melenzüker. Rajiv Kumar Mongolbarnü CEC menden nungi anenogo.

Gyanesh Kumar-i, "Linük yangertsü atema mezüngbuba meraji vote agütsüba lir. Anungji India nung arrshi küm 18 abensar kaji voter ka asütsüla aser teti vote agütsütsüla," ta ashi.

"Election Commission ya teti voters den liasü, voters den lir aser teti alitsü," ta pai ashi.

Gyanesh Kumar ya 1998 Kerala cadre nungi retired Indian Administrative Services (IAS) officer ka lir. Gyanesh Kumar ya tamalen Ministry of Parliamentary Affairs aser Ministry of Home Affairs nung secretary inyaka liasü.

Ministry of Home Affairs nung inyakba mapang nung Shri Ram Janmabhoomi Teertha Kshetra Trust amenokba nung pai tongtibang shilem agia lir aser 2019 küm Arrla 370 agienba sülen Jammu & Kashmir ketdangsuba nunga tongti shilem agia lir.

Pa Kerala kübok Ernakulam nung District Collector aser Kerala State Cooperative Bank nunga Managing Director inyakogo.

Linük Tiri Election Commissioner Gyanesh Kumar Chief Election Commissioner (CEC) aser Haryana Chief Secretary Dr. Vivek Joshi Election Commissioner shimba sülen anogo ka lir Congress-i, "kanga aritepa ayaterm nung telemteba agi" aser ibaji asen linük temzüng aser Supreme Court tetuyuba alema lir, ta aija liasü.

Ato kilonser Narendra Modi leniba nung Lok Sabha nung opposition lenir Rahul Gandhi densema high level senden amenba mapang nung Rahul-i, CEC shimba inyakyim tasenba anema Supreme Court nung ken o benoka lir, anungji iba ken o mangadang tashibo CEC meshima alitsüla, ta mepishia liasü. Ajisüaka committee senden amenba sülen mapang tatsüka tsünga CEC tasenba tenüng sangdonga liasü.

Opposition lenir Rahul Gandhi-i X ajanga, Modi sorkari Supreme Court tetuyuba alema inyakogo, ta aitsü.

"Election Commissioner shimtsü atema committee senden amenba mapang nung ni Ato kilonser aser Home Minister (Shah) na nem tashishiba metetdakja liasü. Supreme Court tetuyuba alema inyakba aser iba committee nungi Chief Justice of India agienba ajanga Modi sorkari election inyakyim nung voters million noklang aika tebilemtsü tamajungba kümdaktsüogo," ta Gandhi-i metetdaksü.

UP CM Yogi-i shisaliok atema mebilemtsür: Akhilesh Yadav

New Delhi, February 19

(Agencies): Bodhbarnü Samajwadi Party tongti lenir, Akhilesh Yadav-i Uttar Pradesh Chief Minister Yogi Adityanath aija, linük nung primary school teimtiba shibanga aliba state ji UP lir, ta metetdaksü.

Uttar Pradesh CM-i shisaliok aser state terenlok atema meinyaker, ta shia taoba mapang UP Chief Minister inyaksang Akhilesh Yadav-i, "Primary school lakh 11 shibangogo aser teimtibaji UP nung lir, ibaji state sorkari shisadangtsüla," ta ashi.

"Oshi mesüra tejakleni aotsü atema CM-i meinyaker aser ibaji tejangja. Record reprangdangra primary school lakh 11 shibangogo. Intermediate schools kwi lapok? Polytechnic süaka, ITI mesüra Engineering süaka sorkari koba tashika anepalur? Shisaliok koma renlokdaktsütsü? Mapang shia

report balala sangdonger. Primary school lakh 11 shibangogo aser teimtibaji UP nung lir, ibaji sorkari shisadangtsüla," ta pai ashi.

Ano SP lenir, Mata Prasad Pandey-ia, Yogi Adityanath-i iba ya Hindu-Muslim onük ka kümdaktsür, ta aitsü.

"Urdu ya-a oshi ka lir. Vidhan Sabha nung benokbaji tanga lenla ka nung liasü, ajisüaka pai (Yogi Adityanath) Hindu-Muslim dak sendakba nung pa tebilemba ataloktsü atema Urdu indang jembi," ta pai ashi.

Mongolbarnü Yogi Adityanath-i Samajwadi Party-i Bhojpuri aser Awadhi oshitem anema nokdakba atema aija liasü.

Yogi-i, SP nung lenirtemi pei chirnurtem English medium school tem nung züngdaktsür saka parnokki Urdu oshi ajungkettsütsü atema jembi, ta metetdkja liasü.



TIR YIMYIM YIMOBILEM (EDITORIAL)

DIMAPUR YANGTEPNÜ, FEBRUARY (TSÜKLAI) 20, 2025

Kaket ken o benjong

Tang Dimapur nung The White Owl aser Penguin na longjemer kaket ken o benjong ayongzüka aliba ya, ashiko, Nagaland nung Naga nunger asoshibo tasen asütsüa akok, kechiyong asenoki amongba benjongtem yabo kaket zülutsü aser azüngtsü ajungshiba benjong masü saka shi ango den chiyonga yartsüngsanga amongba benjongtem dang lir. Ajisüaka, tanü putu nung, talisa, tanurtem aser lanurtem asoshi tenüngdaktibaji kaket azüngtsü aser otsü-olem angatsüba ya lir. Aji oda, benjongsasüyonga shi ango den chiyonga yartsüngsanga benjong mesüaka, kaketshirtem adenshia alima tesem balala nungi kaket zülur aser tesayur mongintem den onük balala nung shisalemsatepa pelatepa amongba benjongjiang tajungba aser tajangzük tuluba asütsü. Tanga benjongbentsü mapangbo nübo, mapang aser senotsü endokba dak alaka tajangzükbo mangur, kechiyong benjong ya tajangzük asoshi amonger masü saka pelatepa anisüngzüksü amonger. Tanü putu nung tebilemtsü tulutibaji smart mobile phone aruba ajanga tanurtem dang masü saka tantsür tambur dena mobile phone nung mapang endokba dak alaka kaket azüngba yimya aser sobaliba to mali kümogo. Aji oda, joko taintemia Laishiba dena mazüng kümogo aser kaketshirtema class takdang nung khen kaket lushia amshiba dak alaka tanüngba mapang ajak mobile phone amshiba nung aonung amuia junga mao süitemdaksür. Iba mobile phone amshiba sobaliba melena akhi ama kaket züluba aser kaket azüngba sobaliba dangi asenok memeyipra, asenoki ajakmeteter amai asütsü saka aji tiyazü asütsü. Mobile phone nung azüngba agi kaket kwika züngtettsü aser kwika zülutettsü ? Aji oda, mobile phone kisüng amshia alirtemji lokti nunga shilem magitettsüsa yimyatsüya balala kümadoktsü aser pa mesüra laji lokti den külemi masü alima balaka nung alir ama kümadoktsü. Iba ama sobaliba tamajung nem asen chinurtem mekokdaksüi shitakba kaketshisatsü bushileni meyipdaksütsü asoshi tang Dimapur nung ayongba ama kaket ken o benjong, Literature Festival & Book Fair, sentong ayongzüka yangji kaketshirtem anidena shilem agidaksütsüla. Tanü tensa asen lima nung ya arogo otsü jembiba aser electoral politics asayaba indang kisüng jembiba agi asenok arogoa rajang akümer aser yimtena mainer. Ibaji meteta asenok, anakhen, kaketshisatsü bushiba dangi meyiptsüla aser shisaliok bushiba nung akhi ama khen asentenshitsüla. Politics tamajung jembiba aser mobile amshiba yimya ajak ya yutsür, asenoki shitakba kaketshisatsü bushiba nung shisa tenük lapoka temeteter aser teinyaker kümra, iba jagi dang asenok arogo aser yimtena yanglushitsü aser kibonga aientsü. Aji oda, akhi mapanga kaketshisatsü agi asenok nüchi aküm aser tanga kaketshisatsü shitak bushitetba agidang asenok nüchi akümtsü. Item shisa tenük lapoktsüba lenmang ajakji kaket azüngba nungi angutsü. Tanübo asenoki kaket azüngba sobaliba tajung to sentokba ajanga tema tereprangtsübo ajak meteter amai saka telonglen temulungjang aser tokolokbo tazüng, kecha mali aser kecha mait kümadoker lir. Iba jagi rongsen bushiba mapa nunga tangar memeneper aser government mapa bushiba nunga takok mangur. Iba tia nung tanübo asenok lenir masü saka tanidaker kümer anogo shia taolen ajak nung tangar nüngsen jembir dang kümogo. Iba kin aser nübortemji asenok masütsüla. Iba ama tatsüngzük tia nungi asen nübortem anitettsü atema kaketshirtem rongnung kaket azüngba ajanga shisatsü bushiba asentenshi mapa aser mapang ka tenzüksü kanga nüngdaka kümogo. Iba ama mapang ka nung Dimapur nung The White Owl teloki kaket ken o benjong ayongzüka ajanga kaketshirtem aika kaket azüngba sobaliba dangi meyipdaksütettsü imlar. Joko, asen lima Mokochung nunga iba ama kaket ken o benjong tuluka ayongzüka akatsü asoshi asen lenirtemi bilem tenzüksübaji kanga tongtibang mapa ka asütsü.

OLEMSABANG

OSANGKAKET AJANGA NÜBUR TAGINUBA METETER

~ L. Kika Pongener.

(Yashi adok nungi...)

Osangkaket nung olemsadak sabang nung, pei lima meimer aikati lokti ajungtsü asoshi pei tebilemba lemsatepa zülur. Aser ocet zülurtem shiaji sempet balala asünung züluyim balala nung zülur. Aji oda, züluyimbaji tongtipangba masü, saka nubur asoshi takitsü lesson karbo lir mali (?) ibaji tongtipangba sudaktsütsüla. Anungji ocet züluba nung kati ka amokmerentsüba tangatetba kija aser lokti shinga daka malitsüla...Aji oda, kija aser lokti kari magizüktettsüsa metokmeperi kar zülusema lira, akokba tashi kati ka akümtsübutepa oyim-osu tajung agi metongshiteptsüla. Tanü putu nung asen Ao oshi nung adokba osangkaket ya internet ajanga soft copy nung alima ajunga nung alir asen kin nutsüng merijang aikati zünga alitsü sudi....Ano asen Naga nunger tangar kintem asen Ao oshi züngtetertem aikati zünga alitsü sudi....Ashiko, olemsadak sabang nung züluba ocet ya kar asoshi tajangzük masüyongjia tangar kar asoshibo kanga tajangzük ngua zünga alitsü akok. Anungji ocet zülur ajaki ocet züludang kati ka ka akümtsübua zülura tazüngertema ajak tajangzük/temoatsü ngua azüngtsü.

Ano osangkaket azünger ajungaji tazünger, tashitemeteter, tangateter, libaliro aser wainshin terabosa meteter dang asünung....Tazünger ajaki molungsentsü temeruk aser shisatsü tesadem agi tajungleni (Positive) angateta azüngtsüla. Ajiser, nisungi dang inyaker /zülur asünung ocet kar nung metok-meperi, tashimait kar, mesura aibelen ailen kar, kija aser lokti kari magizüktettsüsa zülusema lira, ibajia akokba tashi osangkaket nung olemsadak sabang ajanga-jisa metongshiteptsüla....Olemsadak sabang nung aibelenbaji olemsadak sabang ajangjisa metongshiteptsüla....Aji suaka, yimden bangdak sabang amala nung jaoka ken o ashishitepba....Iba amala yabo meinyak-ang tajungba sula. Kechiyong ibala ama tangatetba ya-sa benshira, olemsadak sabang nung ocet zülutsü aikati temulong moulutsü aser ano kaket ken o zülur-a aika malitsü....Aser idangji asen lima aser asen nubur-sa akoksatsü aser tarutsü aliba lanur putu asoshi arangshidak longzük aser shisatsü anetdak sabang makatsü.

Atangji, osangkaket ajanga yimden yimsusuri anir lokti lennirtemi nubur taginuba meteter, nubur ola angashir aser nubur mulongjang angur. Atangji, osang kaket ya nubur mulongjang angudak tanüandangtsü /aina (Looking Glass) ka mesuka lir. Anungji osangkaket nung olemsadak sabang ya yimden yimsusur aser lokti lennir atema kanga-sa tongtipang sabang (Platform) ka ta angatetdi. Ano kanga-sa tesasatsüka, tanü putu nung osangkaket shidi-pak (Hard Copy) alia azünger aser agir kanga ajema kümadagi, ibajagi tanü osangkaket adoker kiburtem takoksa ajurur, aser idangji memeteti kiburtem dang masü, saka nuburtema dena akoksar ta angatettsüla. Aji oda, osangkaket shidi-pak (Hard Copy) nung alia azünger tajemba küma ora osangkaket atoktsü asaktsü, aser tia makai ka anenadokra, kibur dang masü nuburtema akoksatsü. Anungji asenok ajaki osangkaket ya shidi-pak nung (Hard Copy) agia/aliam azüngtsü merangdi aser tangar danga ajongshitepdi....Asenok ajaki osangkaket ya arok meyong senti-rongsen ka amai apayuseta wazüka yudi aser maneni tajungba aser terenlokba nung, tapak talila atoktettsüsa lenmang ajak nung nungita yaridi ta tazüngertem ajak den kü tangatetba lemsateper.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Manipur nungi jenshia alirtem yaritsü PCW-i ayongzüker



Rev. Nan Powell Davies

February 19, 2025: Manipur nung rara ajanga tesem balala nung jenshia alirtem yaritsü asoshi Presbyterian Church of Wales (PCW)-i tayongzükbakaga agütsüogo.

2023 küm May ita nungi tenzüka Manipur nung Kuki aser Meteï kin tsüngda raraba mapang nungi tenzüka nisung aika jenshiogo. Iba rara nung nisung aika asüba den külemi Tenla kitem densema kiojen aika rongdokogo.

Rara ajanga jenshirtem aika India tesem balala aser kidanger linüktem nung aliba refugee camps nung jenoka lir.

Presbyterian Church of Wales (PCW) nung General Secretary, Rev. Nan Powell Davies aser East

Montgomeryshire Pastorate nung Mizo nung pastor, Rev. Rebecca Lalbiaksangi nati tawa Mizoram hills nung aliba refugee camp ka semdanga liasü. Tang iba camp nungji Manipur nungi kibong 40 shi jenoka lir.

Rev. Nan Powell-i, 1840s mapang nung Thomas Jones northeast India-i aruba sülen pai Khrista osangtajung sayutsüngiba dang masü saka nüburttem tenzüksü atema bendanga agüja liasü, ta metetdaksü.

2023 küm Meteï nungertemi amakba tribal nisungtemji Welsh Calvinistic Methodist missionary tem den külemi inyaksemba tribal nisungtem nungi jakzükbakaga lir.

Rev. Powell-i, "Parnok ya onok shilem ka, aser onok ya parnok shilem ka. Tesünep meimba kibongtem aika ni ajuruogo. Parnok akaba ajak samaogo aser parnoki timtem jenti ajangshiogo, ajisüaka parnoki Tsüngrem dak teimla ayu aser kati ka dak metaloker," ta ashi.

Mizoram camp nung jenoka alir kati, "Kiojen rongdoktsüba mapang nung onok arem-i jena ao. Ozü jabaso arrshi küm pongu den kü kinüngbu aser kinüngbu'er tsüraburtem ajak külemi ajen. Onok akaba ajak samaogo aser tangbo onok ket nung kecha mali. Manipur nung ozü alu den business liasü saka tangbo ajak samaogo. Mizo nungertem taochi akhümbok nung onok lidar," ta metetdaksü.

Laisa, "Onok kanga anibelemogo aser tarutsü tia memetet. Manipur nung tatalokba ajanga ozü jabaso kanga aoksaogo aser mapang shia mangpur. Ajisüaka onok meyipa aotsüla, kechiyong ibaji ozü lima," ta ashi.

Rev Powell-i, "2025 küm asen adianutem pei kidangi meyipa aotsü, ki asütsü aser taküm tanaben yangertsü atema onoki kija-kibongtem aser Arogotem dang melungsoa tenla agütsütsü ayongzüker," ta metetdaksü.

ANOGO ABEN TSÜNGREM DEN

TSÜNGREMI NE MERA AJAK ZÜNGDAR

Aser pa madang nungi teyangluba taküm kecha mimbanga mali, saka shiba dang asenok telangzütsü kar, pa madang oset ajak mangsa aser sadaka lir." Ibri 4:13

Tsüngremi Lipok nung alima aser yamaji aliba ajak yanglu. Tsüngremi pai yangluba ajak tenüng agi meteta lir. Tsüngremi meimchir pa mesükba nung yanglu aser Pai meimchir ajak taküm tai meteta lir kechiyong pai Pa mesükba nung yangluba meimchir kolak nung ku tena züngteta lir. Mathi 10:30

Asen meimchir taküm ya Tsüngrem tsüngdang open website link ka ama lir. Koba link nung nemdir iba website telung nung aliba ajak computer screen nung atoker. Iba ama asen meimchir taküm mera ajak aser asen inyaksangshi ajak Tsüngremi reprangdar.

Asenoki tai temenen benshidang alima meimchir k?lakokja tasa aika asateta item temenentem nembangtetsü akok. Saka Tsüngrem tsüngdangbo aji lamakoktsü kechiyong Tsüngremi asen mera ajak dingdar. Pai asen mulungsentsü ajak meteta lir. Tsüngrem serpai yangluba den ochi nung alitsü merangdi.

Mission mapa inyakba atema Canada nunger ka India nungi meindok

February 19, 2025: Assam state nung visa dak sendakba nung Canada nunger ka India nungi meindokogo; Canada nunger Brandon Joel Dewalt-i Jorhat nung aliba Mission Campus nung Grace Church ketdangsüba ketdangsertemi putet, aser ibaji pa indang tourist visa telatetbatem den mapet, ta ketdangsertemi metetdaksü.


Jorhat Superintendent of Police (SP), Shwetank Mishra-i, "2021 küm nungi Dewalt Jorhat nung alir. Bushisüngdangba ajanga pa indang visa ji January 7, 2025 anogo nung tembangogo ta onoki putet. Iba dak alia pai yimsü dak sendakba sentongtem nung sayutsüngia liasü," ta metetdaksü.

"Brandon-i visa renew asütsü atema benoka liasü. Iba tesem nungji alirtemi pai Grace Church nung outreach mapa inyakba onok nem metetdaksü. Iba Arogo ya Jorhat town kübok Borbheta area nung lir," ta SP Mishra-i metetdaksü.

Dewalt-i YouTube channel ka densema social media ajanga yangji aliba nüburttem den tongtepratepa liasü. Ketdangsertemi Youtube channel ji shibangsüogo.

"Pai yangji aliba nüburttem den tongtepratepa aliba kuli aika onoki nguogo," ta Mishra-i ashi.

Dewalt indang tourist visa ji January 7, 2025 nü tembangogo,



Brandon Joel Dewalt

ajisüaka pai mapang tali among. Iba osangji metetdaksüba sülen Kolkata nung aliba Foreigners Regional Registration Office (FRRO)-i pa nem "Leave India Notice" agütsü.

Jorhat police temi Kolkata tashi Dewalt meina ao. Kolkata nungjagi pa Delhi-i ao aser tesüsa Delhi nungi tayimsü ka ajanga Toronto-i ogo.

SP Mishra-i, "Inyakyim ajakji tim telatetbatem ajanga inyak aser iba maparen nung ozüng benokba agency aikati amalitepa liasü," ta metetdaksü.

India-i raliwalirtem atema aser yimsü dak sendakba

maparen inyakertem atema visa balala agütsür. Yimsü dak sendakba maparen inyaker bendangertemi visa balaka meshitsü nüngdak.

2022 küm nunga Assam nung ketdangsertemi Germany nunger tenet aser Sweden nunger asem linük nungi meindoka liasü. Parnok tourist visas ajanga India-i aru, ajisüaka yimsü dak sendakba maparen inyakba atema meindok.

Tang tashi nungbo New Delhi nung aliba Canada High Commission-i iba dak sendakba osang kecha memetetdaksü.

Libya nung kiralongrartemi Khristan 21 tepsetba sülen küm 10 jungogo

February 19, 2025: 2015 metetdaksü.

küm February ita nung "Khristan asübayong Libya linük nung Islamic ISIS-i taochi makai State kiralongrartemi Khristan 21 tepsetba tanü Khristan 21 tekolak onoki bilemteter. Coptic tangzüka lepsetba sülen Khristantem densema küm 10 ajungba nüngtem yimsü nung ajemdaker nung parnok nem akhüm ozüng alema inyakba agüja mongogo, ta mapatem anema US International Christian sorkari maneni Concern (ICC)-i inyaktsüla," ta Hartzler-i metetdaksü.

Khristan 21 jagi Khrista Khristan 21 nungjagi toktsütsü memelungba agi k i r a l o n g r a r t e m i Coptic Khristantem liasü k a n u n g a s e r k a G h a n a l i n ü k n u n g i l i a s ü . P a r n o k a j a k j i L i b y a l e p s e t a l i a s ü .

United States Kiralongrartemi parnok Commission on apuba sülen parnok dang International Religious aiben Khristan yimsü Freedom (USCIRF)-i toktsür Islam yimsü dangi sangdong ka ajanga, meyipang, ta rongshia "Libya nung Khristan 21 liasü, ajisüaka parnoki apuba sülen tepset. Iba Khrista toktsütsü tatalokba sülen küm 10 memelungba agi tesüsa ajungba nüngtem nung parnok ajak tepseta liasü. onoki [USCIRF] asürtem Item Khristantem nem nem akhüm agütsür," ta akhüm agütsütsü aser metetdaksü. parnok bilemtettsü atema

USCIRF Commissioner, 2024 küm More Vicky Hartzler-i tesüiba Productions-i 'The 21' taser mapang ISIS film tatsüka sayaogo. Iba kiralongrartemi taochi film ji 2025 Academy makai Khristantem Award atema 'shortlist' tepsetba onoki aitsür, ta nung shimteta lir.

AO OSHI ANGAZÜKDAK:**TANÜ ANGAZÜKTSÜBA OJANG****Tejepjep**

(v) nemnemshinem, jembia dang aliba (talkative)

* Tantsür karbo kanga tejepjep lir.

Tejepket

(adj) tali chiyongdaktsüba agi yiraa akümba (overfed)

* Ak tejepket nembo chi tilala dang agütsür.



Tir Yimyim

OLONG PAITEP # 7069

1		2			3		4		5
				6		7			
8									
						9			
			10						
11									12
					13			14	
15									
16								17	

TIPIEN

- Nüji masü
- Techinütsüka
- Aketa shirangba
- Pi
- Amena
- Kinü
- Tanang masü
- Lenmang
- Nübo tedi
- Tuoshi
- Shiruru apuba temenatsü

-

(4)

-

(6)

-

(5)

-

(6)

-

(5)

-

(5)

-

(5)

-

(6)

-

(5)

-

(6)

-

(5)

LANGTSÜNGLEN

- Jila tulu
- Sarasademdang tembang
- Tarutsü indang ashitem
- Alia
- Mojing
- Tai inyakba metet
- Medemer chijiba
- Tatokba / Amadok
- Anüngdang masü
- Jabaso masü

-

(5)

-

(4)

-

(6)

-

(5)

-

(5)

-

(5)

-

(6)

-

(5)

-

(5)

-

(4)

OLONG PAITEP # 7068 TELANGZÜBA**TIPIEN :**

- Tesangra, 5. Mungo,
- Kisen, 8. Salem, 12. Semki,
- Kilem, 15. Kensü,
- Sangpang.

LANGTSÜNGLEN :

- Temesen, 2. Raksa, 3. Aon,
- Aso, 6. Nile, 9. Alizüng,
- Omen, 11. Lemta, 13. Ola,
- Kin.

NAI-A YA METETTER MA

SMFG India Credit-i 'Largest Cattle Welfare Lesson (Multiple Venues)' atema Guinness World Record ka yangluogo. India nung tesem 6 nung shilem agir 517 adenba ajanga iba otsü yangluteta liasü. SMFG India Credit 7 buba Pashu Vikas Day (PVD) amongdang iba otsü yanglu aser iba ya India nung 'one-day cattle care camps' tulutiba rongnung ka lir. State 16 kübok tesem 500 nung camp ayongzüka agidang beneficiaries 1,90,000 (1,50,000 cattle & 40,000 cattle owners) aden.

Tanur asoba anogo nung salem osang den noksa angati adokdaktsünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

Mizoram nung mezüngbuba skywalk lapokogo

Aizawl, February 19, 2025 (Agencies):

Mizoram-i tourists atsür arutsü atema Aizawl nung state nung mezüngbuba skywalk lapokogo.

Chief Minister Lalduhoma-i Mongulbarnü Aizawl Peak Resort (Hangi Lunglen Tlang) nung sky bridge lapokja liasü.

Iba skywalk ya Zoram People's Movement (ZPM) MLA H. Ginzalala-i yanglu aser pa kibur lir. Ginzalala ya

technical adviser to the chief minister lir.

"MLA Ginzalala aser par kibongi Mizoram nung mezüngbuba skywalk yangluba atema tenüngsang agütsür" ta CM Lalduhoma-i ashi.

Iba skywalk ajanga state nung tourism ajungkettsü imlar ta paisa ashi.

Iba sentong nung assembly speaker Lalbiakzama, Urban Development & Poverty Alleviation minister K. Sapdanga, Tourism minister

Lalrinpuii aser tanga MLA tem aden.

Aizawl nung skywalk ya Pune nung amenoka aliba Nail India Adventure Private Limited, Pune ajanga yanglu.

Iba skywalk ya 30mm toughened glass agi yanglu aser meter 10 talang lir. Iba skywalk nung khen nung nisung 135 senzütsü akok.

Ajisüaka, safety measure ama khen nung nisung teimba agia 20 tashi dang külemi jasadaktsütsü.

Umrangso nungi tang tashi nung tasü mang 5 ngutetogo

Guwahati, February 19, 2025 (Agencies): Umrangso mine nungi tzü atsüdokba maparen tembangogo aser retrieval operations tenzükogo ta Assam Chief Minister Himanta Biswa-i Bodbarnü ashi.

Nakmati atudak nungi tang tashi nung tasü mang pungu agitetogo aser parnok maitsü jangjaba maparen inyakdar ta CM Sarma-i ashi.

Umrangso nung rescue aser recovery efforts nung iba ya alizüng tongtipang ka tongtetba lir kechiyong ketdangsürtemi kanga dang meranga ali telung nungi madokteti aliba nakmati aturtem bushitepa arur.

Assam sorkari tasür kibong ajak nem nüngdakba teyari agütsütsü nangzükogo.

Bodbarnü National Disaster Response Force (NDRF) aser

Indian Army nungi search and rescue teams ajanga 3 Kilo Umrangso area nungi tasü mang ka ngutetogo.

"Tanü rescue teams-i tasü mang ka ngutetogo. Maitsü jangjaba maparen inyakdar" ta Mines & Minerals Minister Kaushik Rai-i ashi.

Tang tashi nung nakmati atur nisung pungu tasü mang ngutetogo aser ano nisung pezü mangu bushiteper.

Manipur nung HSLC tatidang magütsüdaktsüba atema lungkak ait

Imphal, February 19, 2025 (Agencies): Imphal nung High School Leaving Certificate (HSLC) Examinations 2025 magütsüdaktsüba atema kaketshirtem aser parnok tsürabur o guardians-i lungkak aitogo.

Manipur nung Board of Secondary Education Manipur (BSEM) ketdangsüba kübok tanü nungi HSLC tatidang tenzük aser March 7, 2025 nü atemtsü.

Imphal East district kübok P Namjolung High School nungi kaketshir 31 tashi HSLC examinations 2025 magütsüdaktsü.

School ketdangsürtem den tongtepratep masüba ajanga kaketshirtem nem examination admit cards magütsü ta ketdangsürtemi ashi.

Lungkak aitertermi item kaketshirtem tatidang agütsütsü atema lenmang ka bushiteptsü



takhangba agütsü.

Lungkak aitertermi "Save the careers of students of the Namjolung High School" ta tezüluba amer lungkak aita liasü.

School principal-i la dang tatidang agütsü anogo ka lia school nungi exam admit card agizüktsü ashi saka school ketdangsürtemi la nem magütsü

ta kaketshir kati ashi.

Kaketshir 31 nem admit cards magütsü aser iba ajanga parnoki HSLC examinations 2025 magütsütettsü.

(HSLCE) 2025 atema kaketshir ajak agi 37,052 lir aser parnok examination centres 155 nung tatidang agütsütsü. Iba ya valley nung centres 93 aser hills nung centres 62 lir.

Nenoki metenzüktsüla rara tenzük: Trump



Palm Beach, Tsüklai/February 19 (Agencies): United States Tir Donald Trump-i tan ita Russia Tir Vladimir Putin ajurutsü ta ashi aser kasa mapang Moscow-i amakba atema Ukraine Tir Volodymyr Zelenskyy tenüing asen.

Mongulbarnü Saudi Arabia nung US aser Russian ketdangsürtem mezüing senden amenba sülen osangbener den jembidang Ukraine nung Russia-i amakba tatem kati arutsü asoshi jembishinüba nung Kyiv nem menden kata magütsüba asoshi ashishiba Trump-i magizük.

"Iba rara tembangtsü asoshi küdak tashi lir amai bilemer, aser junga otar ama bilemer. Saka tanü, 'Oh onok mejaok,' ta jembiba ni angashi. Nenok yangji küm asem liasü. Nenoki tembangtsüla liasü..." ta Trump-i Palm Beach, Florida nung par Mar-a-Lago estate nung osangbener senden ka nung ashi.

"Nenoki kodanga metenzüktsüla liasü. Nenoki tezüngzüktep ka yanglula asü. Ni asübo Ukraine atema tezüngzüktep ka yanglur lila."

US Secretary of State Marco Rubio aser Russian Foreign Minister Sergey Lavrov nati anir Riyadh nung jembishinüba sülen Trump-i tangatettep kati arutsü temulung lemteta lir ta ashi.

"Parnok kanga junger liasü. Russia-i langka inyakner, parnoki tazü mapa inyakba anenner," ta pai ashi.

Yimjung tezüngzüktep ka yanglutsü asoshi Ukraine nung election agitsü Russia-i ajungshiba nung pa indang administration-ia yaritsü asü ta asüngdang dang, Zelenskyy indang approval rating ya shilem 4 dang lir, ta kuli tejangja magütsüi Trump-i ashi aser martial law kübok linük indang election magi anendaka lir ta ashi.

December ita Kyiv International Institute of Sociology ajanga opinion poll ka

agiba nung telangzür shilem 52-i Zelenskyy dak tamang akar ta ashi, koba February ita agiba poll dang shilem 12 agi tajemba liasü.

Table nung menden aginer, saka Ukraine nung aliba nüburtemi 'Election agir mapanga talangka masü na?' ta asüngdangtsü, ta Trump-i ashi.

"Aji Russia indang masü, ibaji ni jembir aser danga linük aika nungi kasaji arur." Onok medeni Washington aser Moscow nati tezüngzüktep atema kecha merenemtsüla ta Kyiv tangatetba lir ta Zelenskyy-i yashi-yakünü ang jembir lia Trump-i iba o ya ashi.

"Ukraine nung rara tembangtsü atema Ukraine medeni telemtetba magitettsü," ta Zelenskyy-i Turkiye nung osangbener dang ashi, kong pai Turkiye Tir Recep Tayyip Erdogan den jembishinüa liasü.

Mongulbarnü Riyadh nung senden amenba mapang Rubio aser Lavrov nati Ukraine nung akok tashi tekeratiba nung rara tembangtsü asoshi lenmang bushi tenzüktsü atema linük ana nungi high-level team shimtsü mulungtep, ta US State Department-i ashi.

US National Security Advisor Mike Waltz-i Riyadh

nung osangbener den jembidang, litsü-lika aser rara sülen security guarantees indang densema asangsang nung jembitsü ta shia liasü.

Rara tembangtsü asoshi tezüngzüktep ka yanglutsü mechi Trump-i Moscow nem alinük tulu agütsütsü mulunger südi ta tebilemstü akaba mapang European lenirtemi US-Russia jembishinüba nung lungjemer telangzüba magütsüteter.

Tan hopta United Kingdom Ato Kilonser Keir Starmer-i Ukraine dangi peacekeeping troops yoktsü mulunga lir ta shia liasü aser külen France Tir Emmanuel Macron-i raraba tesem alema oa tezüleni sepai tatakzük yoktsü bilemdangtsü ta ashi.

Hombarnü German Chancellor Olaf Scholz-i agreement kata meyangludangi rara sülen security force atema jembitsü ya khenyongi tim masü ta ashir.

Poland Ato Kilonser Donald Tusk-ibo par linüki Ukraine dangi sepai yoktsü nükla mangur ta ashi.

Iba ken o jembitsü asoshi France-i Bodhbarnü European lenirtem senden tanabuba Bodhbarnü ayongzüktsü imlar, kechiaser Hombarnü ajungben senden ka amenba nung telemtetba tajung ka magitet.

Mar-a-Lago nung osangbener senden nung jembidang Trump-i European peacekeepers amshitsü mulunga aliba lemsatep saka US sepai medendaktsütsü ta ashi.

"Parnoki aji inyaknera kanga junger, nia mulunger. Parnoki aji inyaknera nia mulunga lir," ta Trump-i ashi.

Hamas-i pua alir ajak chioktsü maongka agütsü



Gaza City, Tsükali/February 19 (Agencies): Teti atema yimjung aser Gaza nungi Israel army ajunga atsüngintsüba melena Hamas-i parnoki Gaza Strip nung pua yua alir nung chioktsü atema benokogo.

Bodhbarü Hamas otongdar Hazem Qassem-i, ceasefire atema tenangzüktepba kübok tanabuba shilem nung par telok nükjidong lemsatepogo, kong tepuokertem melenteptsüba densema lir.

"Onok tanabuba shilem atema renema lir, kong tepuokertem khenyongi dang ajak melenteptsü, saka iba kübok teti atema ceasefire ka benoktsüla aser Israel nunger sepaitem Strip nungi meshimeshia atsüngintsüla," ta Qassem-i ashi.

Iba telok yagisa Israel-i parnok disarmament aser Strip nungi agintsüba benokba magizüki liasü.

"Gaza Strip nungi Hamas pur agintsü atema benokba ya tamagitsü psychological war ka aser Gaza nungi atsüngintsüba mesüra resistance pur disarmament ya khenyongi agizüktsü makoktsü," ta Qassem-i

shisem.

Qassem-isa taruba Honibarnü tepuokertem melentepba mapang nisung asem chioka aliba trok chioktsü atema par teloki telemtetba agiba lemsatepa liasü. Iba telemtetba ya Hamas lenir Khalil al-Hayya-i anogo ka tejakdang sangdonga liasü, koba tenangzüktepba tanabuba shilem takaratiba nung benoktsü nükjidong nung telemtetba agiba asütsü ta amanger.

"Ken o sensaksemstürtemi mepeshiba sülen tepuoker talila chioktsü atema telemtetba agiogo aser iba ajanga tenangzüktepba kübok inyakyimtem shitak benoka inyaktsü atema onok bendaga agütsür aliba sayur," ta Qassem-i Bodhabarnü ashi.

United States tir Donald Trump-i, hopta shia Israel nungi pur aoba tepuokertem chiokba indang ashishiba den Gaza nung pua alir kinungertemi parnok ajak külemi chiokdaktsütsü ayongzükba sülen tang tepuoker talila chioktsü benokogo.

Israel-i mobile homes aser construction equipment tem Gaza Strip-i bener aotsü temelaba agütsüba sülen tenangzüktepba takaratiba nung benoktsü atema jenjang agidar.

Israel nunger sepaitemi border crossings tongtibanngtem ajak nokdanga lir aser tenüngdakba osettem aser kisü dang amshiba osettem bener aitsü temelaba magütsüi arudar.

Taoba hopta Hamas-i, tenangzüktepba nung aibelena Israel-i mobile homes aser heavy equipment tem Gaza-i bener aitsü memelar ta shia tepuokertem chiokba anena atatsü amokmerena liasü.

Gaza indang Ministry of Health-i ashiba agi, iba rara nung nisung 48,291 süogo aser nisung 111,722 yirugo.

Kishida takum samatsütsü merangsang tepuokdak ayutsü

Tokyo, Tsüklai/February 19 (Agencies): 2023 küm campaign ka nung taoba Japan Ato Kilonser Fumio Kishida dak kidang yangluba pipe bomb ka mereploktsüsang küm 10 tepuokdak atutsü okadak kati obendang agütsüogo.

Wakayama District Court-i Bodhbarnü ashiba agi, arishi küm 25 tain Ryuji Kimura-i iba bomb mereploktsüba ajanga teraksatsüba bener arutsütsü aliba indang pai meteta liasü, ta Japan indang Kyodo News agency-i metetdaktsü. Taoba PM amakba ya democracy anema

inyaksangshiba ka ta züngshir aser nüburtem aika atema lendong lir ta obendang agütsüba nung shia lir, ta Kyodo-isa metetdaktsü.

Wakayama yimti nung 2023 küm April 15 nü Kishida maka tepsettsü merangba atema Kimura aitsüogo. Pa ano bomb aser tanga hadir dak sendakba nung temzüng ozüng alema inyaksangshiba densema tanga aibelen pezü atema aitsüogo.

2022 küm July ita taoba premier Shinzo Abe tepsetba sülen küm ka majung tsüngda Kishida amak saka pa meyrui

jenboa liasü.

Kimura-i February ita tetenzüklen obendangba mapang pai Kishida tepsettsü atema kecha tebilemba maliasü ta shiogo. Pai ashiba agi, pai Japan nung election inyakyim agi temulung mesüi liasü aser tongtibang yimden yimsüsür ka maka nüburtem nem pa jangjadaktsünüa liasü.

Prosecutors temi pa küm 15 tepuokdak ayutsü akhang aser kasa mapang nung Kimura indang defence team-i pa küm asem dang tepuokdak ayutsüla ta ashi, kechiyong pai Kishida tepsettsü merangba masü ta shiogo, ta kasa sangdong ajanga metetdaktsü.

Barak FC-i goal 2 agi Red Scars akok



Dimapur, Tsüklai/February 19 (TYO): Nagaland Super League tenzüker February 19 nü Chumoukedima Football Stadium nung tinübuba asaya asayaba mapang Barak FC-i goal 2-0 agi Red Scars FC kokogo.

Iba asaya ajanga team ana tasa aser kanga toktepa asayaba sayuogo.

Bodhbarnü asaya mezüngbuba shilem nung telok kati danga goal magütsüteri asaya aser defence kanga ajanga nokdakba sayua liasü.

Barak FC indang ball position 57% liasü aser parnoki target nung ka metsüba densema shot 5 süa liasü. Kasa mapang nung Red Scars FC-i

anaben shot asü saka ka danga target-i mao. Team anapronglai kanga aggressive süa asaya aser Barak FC-i foul pezü mena aser Red Scars FC-i asem mena liasü.

Asaya tanabuba shilema Barak FC-i maneni amokbanger asaya liasü. Barak FC goal keeper-i minute 47buba nung goal aitsü aliba ball ka kanga junga nokdanga liasü. Iba sülen minute 49buba nung Laiwang-i metsüba ball ka tezüleni ao aser offside flag-a sayua liasü.

Asaya nung Red Scars FC puri parnok defence koda ajang aji sayua goal achitsü aliba nungi jenboa liasü. Minute 53buba nung Red

Scars FC-i goal idaktsütsü asoshi maongka angu saka maongka magitet.

Iba mapang tashi nung team anapronglai substitute asayartem aniok tenzüka Barak FC atema minute 56buba nung Toka Achumi ait aser Red puria minute 59buba nung asayar melena liasü. Asayai aiter mapang tatsüka dang lir minute 61buba nung Toka-i goal idaktsütsü merang saka ball bar nung ondaka liasü.

Team ana kanga toktepa asaya aoba sülen minute 63buba nung Kamei-i agütsüba ball ka Kenumdi-i kanga junga idakja Barak pur tejakdang kümdaktsü. Red Scars FC-ia minute 72buba nung goal idaktsütsü asoshi maongka angu saka ball goal keeper dangi indang indanga ao.

Iba sülen Kenumdi-isa minute 79buba nung Barak FC asoshi tanabuba goal idakja parnoki asaya kokogo.

Iba asaya akokba sülen Barak FC pur league table nung temaba jenjangi tuogo.

Wokha nung Sepaktakraw coaching camp agidar

Dimapur, Tsüklai/February 19 (TYO): Wokha District Administration, Mission Shakti kübok department of Social Welfare aser District Hub for Empowerment of Women (DHEW) den District Sports Office and Youth Resource & Sports longjemer tetsürtem atema February 18 nungi 22 tashi anogo pongu asoshi Sepaktakraw coaching camp ka ayongzüko.

Iba camp ya Beti Bachao Beti Padhao (BBBP) sentong tenzüker küm 10 ajungba nungdem nung ayongzüko aser Local Ground, Wokha nung tang tagidak lir.

Iba coaching camp ya department of Youth Resource & Sports (YR&S) aser Wokha district Sepaktakraw Association (WDSA) nati nongita yaridar aser State Sepaktakraw coach, YR&S Puleuo coach tongtiba lir aser pa nem SAI Dimapur nungi senior International asaya ka aser national asayar anati teyari agütsüdar.

Camp tenzüka anogo sentong nung o jembiba mapang Deputy Commis-

sioner Wokha, Vineet Kumar (IAS)-i, iba camp nung shilem agitsü atema shirnokisa parnok tenüng züngoksemogo parnok kanga tia taka, kechiyong parnok nem tajashiba aika bener aliba coach temi tangazükba agütsütsü, shirnok national aser international jenjang nung asayar lir, ta ashi.

Paisa, taoba mapangbo asaya nung maongka aikabo monguteti liasü, ajisüaka alima renlokyonga aoba mapang asenoki asaya mashika profession aser career ama shimtetsü, ta shia pai camp nung shilem agirtem dang anogo pongu tsüngda bendanga agüja takokba tashi angazütsü aser taküm nung nükjiding atongtsü asoshi meranga inyaktsü ajungshia liasü.

Ajak senteper iba camp nung asayar 83-ishilem agidar. Trainees tem rongnung tetsür 39 aser tebur 44 densema lir.

Camp lapokba sentong ya Gender Specialist, DHEW, Merithung Lotha lenisüba nung agiaser DSO & DYRO Libemo Jami-i okila jembia liasü.

Champions League: Bayern round of 16-i iogo



Bayern aser Celtic na asayaba mapang Alphonse Davies-i goal idaktsüba sülen pelatepba noksa nung angur.

Tsüklai/February 19, 2025 (Agencies): Mongolbarnü Celtic akokba sülen Bayern Munich pur Champions League round of 16-i iogo. Bayern den Club Brugge aser Benfica nata taruba round-i iogo, saka Feyenoord den draw asüba sülen AC Milan bo tsükogo.

Away leg nung Bayern-i goal 2-1 agi asaya koker liasü, saka kidang asaya nung junga masayatet.

Asaya nung Celtic puri minute 63buba nung Nicolas Kuehn ajanga mezüngbuba goal idakja liasü. Kim Min-jae-i aibelenba sülen iba goal

ya idakja liasü.

Ajisüaka goal Kasasa aküm nung mapang apuloktsü asayatsü ta bilema aliba mapang injury time minute pezübuba nung Davies-i Bayern atema goal ka idakja goal 1-1 aküm aser parnoki asaya 3-2 aggregate nung koka liasü.

Taruba round nung Kompany-i aniba team ya taruba Hokolbarnü Bayer Leverkusen mesüra Atletico Madrid den asayatsü.

Mongolbarnüsa San Siro nung AC Milan aser Feyenoord na asaya goal 1-1

agütsür tembangba sülen Mila pur tsükogo. Feyenoord-i 2-1 aggregate nung asaya koka liasü.

Asaya nung Santiago Gimenez-i Milan atema goal ka idakja aggregate kasasa aküm, ajisüaka Carranza-i minute 73buba nung Feyenoord atema goal ka idakja goal Kasasa akümba sülen parnoki aggregate nung asaya koka liasü.

Parnok round of 16 nung Inter Milan mesüra Arsenal den asayatsü.

Kasa mapang nung Lisbon nung Benfica aser Monaco na asaya 3-3 nung tembangka Benfica-i 4-3 aggregate nung asaya kokogo aser parnok Barcelona mesüra Liverpool den asayatsü.

Maneni Club Brugge nungi asayar Chemsdine Talbi-i goal ana idakja parnoki Atalanta 3-1 agi akok aser 5-2 aggregate nung parnok round of 16-i iogo.

Talbi-i goal ana idaktsüba sülen Ferran Jutgla-ia par team atema goal ka idakja parnoki asaya ayong ayonga koka liasü. Parnok taruba round nung Lille mesüra Aston Villa den asayatsü.

Shubman No. 1 asayar kümogo

Tsüklai/February 19, 2025 (Agencies): India team vice-captain Shubman Gill-i Pakistan nunger asayar Babar Azam ajateta tawa sayaba ICC rankings nung batter tem rongnung temaba jenjangi tuogo.

England den kidang tawa asayaba ODI asayamung nung kanga junga asayaba sülen Gill-i Babar ajateta batter tem rongnung No. 1 asayar kümogo. Babar mapang tatsükabo No 1 asayar liasü.

Arishi küm 25 tain India nunger Opener yagi England 3-0 agi akokba asayamung nung tongtibang shilem agia half century ana aser century ka yanglua liasü. Iba sülen pai rating point 796 ngua Babar ajatetogo, shibai point 773 ngua lir. 2023 ICC Men's Cricket World Cup mapanga Gill temaba jenjang nung liasü aser tang agi tanabenbuba pa temaba jenjangi tuogo.

India captain Rohit Sharma-i rating point 761 ngua pa tasembuba jenjang nung lir aser South Africa nunger asayar Heinrich Klaasen aser New Zealand nunger Daryl Mitchell na pezübuba aser pongububa nung lir.

Pakistan aser Dubai na nung Champions Trophy tenzütsü lia ICC-i rankings nung temelenshi adokba lemsatapa liasü.

ODI bowling rankings nung Sri Lanka nunger asayar Theekshana temaba jenjang-i tuogo. Pai Afghanistan nunger asayar Rashid Khan ajateta liasü. Sri Lanka pur Champions Trophy nung masayaka Theekshana-i Australia den asayaba mapang kanga junga asaya-a rating point 680 nguogo. Pai Colombo nung asayaba mapang wicket pezü agia liasü. Pa sülen Rashid point 11 agi tajemba sür tanabuba jenjang nung lir.

BILEMDANGANG

"Yashi nungi anagazükang, tanü asoshi liang aser asüng asoshi teimla yuang."